

白樂天文集卷之十

表

為宰相賀赦表



臣某等言伏奉今日制書大赦天下者臣與百執事
奉揚宣布與億兆衆蹈舞歡呼自天降和率土同慶
臣等誠歡誠抃頓首頓首伏惟皇帝陛下出震仰極
建元發號大明升而六合曉一氣熏而萬物春普赦
舊刑滌瑕蕩穢凡在元首納於歡心矧又祗祀天地
孝享宗廟蠲減租庸策徵賢良褒德及先賞功延嗣

敬賓養老念舊睦親生人之積弊盡除有國之類綱
必舉况陛下承二百祀鴻業之重纂十一聖耿光之
初始舉嚴裡新開寶曆天下之目專專然觀陛下之
動天下之耳顯顯然聽陛下之言斯則陛下出一言
不終日必達於朝野舉一事不決辰必聞於華夷當
疲人求安思理之秋是陛下敬始慎微之日苟行一
善則可以動人聽而式歌舞况其衆美信足以感人
心而致和平康哉可期天下幸甚臣等忝居重位幸
屬鴻休慙竊股肱喜承骨髓歡欣悚躍倍萬下情無

任鼓舞慶幸之至

蘇州刺史謝上表

臣居易言伏奉三月四日愚智授臣使持節蘇州諸
軍事守蘇州刺史以某月二十九日發東都今月五
日到州當日上訖時當明盛寵在藩條祇命荷恩以
感以懼臣某誠歡誠幸頓首頓首伏惟皇帝陛下嗣
膺曆數重造寰區期致升平在先政化詢求牧守勤
恤黎元實陛下慎選維良之秋責成共理之日也臣
以微陋早忝班行前自中書舍人出為杭州刺史幸

免敷闕實無政能已蒙寵榮入改官相今奉恩寄又
分郡符獎飭具載於詔中慶幸實出於望外况當今
國用多出江南江南諸州蕪穡為大賓數不少稅額
頗多土雖沃而尚勞人徒庶而未富宜擇循良之吏
委以撫綏豈臣瑣劣之才合當任使然既奉成命敢
不誓心必揆夕惕夙興焦心苦節唯詔條是守唯人
瘼是求輸陛下憂勤之心布陛下慈和之澤則亭育
之下疲人自當感恩而歲時之間微臣或希報政塵
瀆皇鑒吐露赤誠寵至空驚恩深未答無任慙惶懇
惶誠恐頓首頓首謹言

為宰相請上尊號第二表

臣某等言今月二十四日臣等已陳表章請上尊號
愚誠雖懇聖鑒未迴躊躇地跼天不勝大願臣等誠惶
誠恐頓首頓首臣聞大道者無求於物物尊而不辭
至公者非欲其名名生而不諱不諱故與天合德不
辭故率土歸心斯所謂應乎天而順乎人者也伏惟
皇帝陛下嗣興一德統牧萬方致時俗之和平納生

靈於富壽金革已偃銷七十載之厲階玉燭方調啓
一千年之聖運天人合應書軌混同而鴻名未加誠
典猶缺華夷失望史策無光此誠君上之謙然亦臣
下之罪也今臣所以上稽天意下酌人情再黷皇明
重陳丹慙臣謹按書曰思作蕃蕃作聖又曰乃聖乃
神乃武乃文經曰明王以孝治天下凡此三者歷觀
列辟雖其盛德莫能兼之伏以陛下自即大位及此
二年無巾車汗馬之勞而坐平鎮冀無亡弓遺鏃之
費而立定幽燕仁和一薰蕕驚盡化可不謂蕃文乎

削平天下震耀八荒北虜求婚以稟命西戎乞盟而
納款威靈四及奔走來王可不謂神武乎陛下以萬
乘之尊四海之富供養長樂道光化成推而置之可
塞天地可不謂孝德乎故臣等敢冒死稽首上尊號
乃睿文神武孝德伏惟陛下畧撝謙之小節弘祖宗
之大猷惟十一聖在天豈忘繼其志以億兆人為子
寧忍阻其心特迴宸衷俯受徽號在玄功不為主宰
於盛德有所形容煥乎大哉垂裕無極此實天下之
幸甚非獨臣之幸也臣等無任誠願懇禱之至

為宰相讓官表

臣某言伏奉今日制書授臣某官同中書門下平章事者寵擢非次憂惶失圖踳地跼天不知所措臣某誠兢懼頓首頓首臣聞上理陰陽下平法度外撫夷狄內親黎元使百官各脩其職一物不失其所此宰相之任也臣有何功德有何才能越次超倫忽承此命下乖人望上紊朝經致寇速尤無甚於此臣謬因文學忝列班行先朝之人擢居內職星霜屢改爵秩驟加未逾十年忽登相位名浮於實任過其才豈

唯覆餗是憂實累知人之鑒况陛下肇開曆數將致升平輔弼之臣尤宜慎擇臣粗知古今敢言本末樞衡要地初不得人則理化勞心終無成日此所以重陳手疏再瀝血誠乞迴此官別授能者臣若得請便不負私恩情見於辭非敢飭讓皇天白日實鑒臣心無任懇欲屏營之至謹奉表陳讓以聞

為宰相賀雨表

臣某言臣聞聖明在上刑政叶中則天地氣和風雨時若常聞其語今見其時臣某等誠歡誠躍頓首頓

首伏以陰陽氣數盈縮相隨去秋多霖今春少雨宿麥猶茂農功未妨陛下念物憂人先時戒事靡神不舉有感必通故雲出于山月離于畢初洒盞以霽霖漸破塊而霧霓團囷疇無不霑足雨之所致臣知其由自上而來雖因天降從中而得實與心期發於若厲之誠散作如膏之澤凡在率土孰不歡心臣等位忝鈞衡職乖燮理仰陰陽而增懼顧霖雨而潛思無任兢惕之至

為宰相賀殺賊表

臣某等言伏承某道逆賊某乙某月某日已被某殺戮訖皇靈震耀堯曩臬夷率土普天歡呼鼓舞臣等誠喜誠抃頓首頓首臣聞亂臣賊子阻兵干紀者明則有天討幽則有鬼誅遑速之間罔不殲殄伏惟文武孝德皇帝陛下若臨八表子有羣生合天覆地載之德順春生秋殺之令宿寇遺孽聞然銷亡四海九州廓然清晏逆賊某乙一介賤隸兩河叛人包藏禍心竊弄凶器戕害主帥虔劉良善慕燕鼎魚偷活頃刻顛木之餘拚殛殛之遺種斧斤欲加而先折鍼石

未攻而自潰不有乎伐孰知德威不有妖氛孰知神
筭則天下之心有以知順存逆亡其猶影響者也臣
伏以某乙既已斬首某乙將何保身若不乞降即應
生變輔之或在車則相依皮既不存毛將不附况我
乘破竹彼繼覆車止戈之期翹足可待無任喜慶抃
躍之至

賀雲生不見日蝕表

臣某等言臣聞堯湯之逢水旱陰陽定數也宋景之
感災感天人相應也蓋天地大統不能無災聖主至

誠可以銷慝嘗聞此說今偶其時臣等誠欲誠幸頓
首頓首伏見司天臺奏今月一日太陽虧者陛下舉
舊章下明詔避正殿降常服禮行於已心禱於天天
且不遺物寧無應况正陽月朔亭午時中和氣周流
密雲布護蒙然暫蔽赫矣復明屏翳朝躋但驚若烟
之涌曜靈晝掩不見如月之初所謂誠至於中而感
通於上者也臣等敢不再陳事理重考徵祥三光忌
盈必有時蝕萬物莫覩與無災同慶生交感之間喜
泱照臨之內雖慶雲五色瑞景在中除珍致祥曾何

足此百辟伏賀萬人仰觀事彰天鑒孔明道紀日新
其德臣等幸遭昌運謬荷殊私皆乏濟時之才同居
待罪之地日月薄蝕自慙燮理無功山川出雲實賴
聖明有感感質欣戴倍萬常情無任并躍竦踴之至
為宰相陳情表

臣直言臣有情事以未敢言今輒陳露伏增戰灼臣
亡父某官亡妣某氏是臣本生亡伯某官某贈某官
臣今承後建中初德宗皇帝念臣亡伯位高無後以
猶子之義命臣繼紹仍賜臣名嗣襲雖移孝思則在

上荷君命永承嗣絕之宗中奪私恩遂阻勦勞之報
歲月曠久情禮莫申自去年以來累有慶澤凡在朝
列再蒙追崇或有陳乞皆許迴授况臣猥當寵擢繆
踐台階爵祿之榮實有踰於同輩顯揚之命獨未及
於先人飲泣如悲哀慙兩極臣今請以在身官秩并
前後合叙勲封特乞聖慈迴充追贈倘先所請無辜
獲新則春鳥鳥之心猶藉生而展養犬馬之力誓萬
死以酬恩躋地仰天不勝感咽披陳誠懇煩黷宸嚴
無任惶懼激切之至謹奉表陳露以聞

忠州刺史謝上表

臣某言臣以去年十二月二十日伏奉勅旨授臣忠州刺史以今月二十八日到本州當日上訖殊恩特獎非次升遷感戴驚惶隕越無地臣誠喜誠懼頓首頓首臣性本跡愚識惟褊狹早蒙存錄擢在翰林僅歷五年每加塵忝竟無一事上荅聖明及擢執官察卑冗跡賤不能周慎自取悔尤猶蒙聖慈曲賜容貸尚加祿食出佐潯陽一志憂惶四年循省晝夜飲食未嘗敢安負霜枯葉雖思向日委風黃葉敢望回春

豈意天慈忽加詔命特從左郡寬授專城喜極魂驚感深泣下方今淮蔡底定兩河近寧臣得為昇平之人遭遇已極况居符竹之寄榮幸實多誓當負刺懼身履承屬節下安凋瘵上副憂勤未死之間期展微効竭身地遠仰首天高螻蟻之誠伏希怜察無任誠激懇款謹初之三謹遣某官某乙奉表陳謝以聞臣某誠惶誠恐頓首頓首謹言

賀平滯青表

臣某言伏見二月二十二日制書逆賊李師道已就

梟戮者皇靈有截春筭無遺妖氛廓清遐邇慶幸臣
某誠歡誠喜頓首頓首臣聞亂常干紀天擊神誅李
師道包藏禍心暴露逆節罪盈惡稔衆叛親離未勞
師後自取擒戮伏惟睿聖文武皇帝陛下文經天地
武定華夷凡是猖狂無不誅剪兩河清晏四海會同
昇平之風實自此始臣名叅共理職忝分憂抃舞歡
呼億萬常品守官有限不獲稱慶闕庭無任慶快踴
躍之至謹具奏聞謹奏

賀上尊號後大赦天下表

臣某言伏捧七月十三日制書大赦天下跪奉宣布
蹈舞歡呼自天降休率土同慶中謝臣聞玄德盛功
非鴻名不能形容物屬人疵非皇澤不能滌蕩自非
上聖莫能兼之伏惟元和聖文神武法天應道皇帝
陛下纂承大業子育羣生信及豚魚威殲梟鏡削平
寰海混一車書億兆一心願崇大號從人欲而俯膺
盛禮賜時和而廣洽皇恩蠲減賦租收拔淹滯命黜
陟而別能否開諫議而策賢良宿弊必除舊章咸舉
聖王能事盡集於今凡在生靈孰不幸甚臣謬當委

擢職在頒條扞躍之誠倍萬常品限以守官不獲稱
慶闕處無任慶抃之至

杭州刺史謝上表

臣某言去七月十四日蒙恩除授杭州刺史屬扞路
未通取襄漢路赴任水陸三千餘里晝夜奔馳今月
一日到本州當日上任訖上分憂寄內省庸虛仰天
戴恩竭地失次臣某中謝臣謬因文學忝廁班行自
先朝黜官以來六年放棄幸陛下嗣位之後數月徵
還立歸帝京寵在即署不踰年擢知制誥未周歲正

授舍入出泥登霄從骨生肉唯有一死擬當報恩旋
屬方隅不寧朝廷多事當陛下肝食宵衣之日是微
臣輸肝寫膽之時雖進獻愚衷或期有補而邊思事
理多不合宜臣猶自知况在天鑒忝非土木如履水
泉合當鼎鑊之誅尚忝藩宣之寄才小官重恩深責
輕欲答生成未知死所唯當夙興夕惕焦思苦心恭
守詔條勤恤人庶下蘓凋瘵上副憂勤萬分之恩莫
耐一二仰天舉首望闕馳心葵藿之志徒傾螻蟻之
誠難達無任感恩激切之志謹奉表稱謝以聞

為宰相謝官表 為微之作

臣某言伏奉今月日制書授臣守本官同中書門下平章事者殊常之命非望之恩出自宸衷加於凡陋竦駭震越不知所為中謝臣伏准近例宰相上後合獻表陳謝臣今所獻與衆不同伏惟聖慈特賜留聽臣伏聞玄宗即位之初命姚元崇為宰相元崇欲救時弊獻事十條未得請間不立相位玄宗明聖盡許行之遂使太平實由於此陛下視今日天下何如開元天下微臣自知才用不遠不及元崇若僥使安懷

因循保位不惟無德是負實亦軍國可憂自欲候坐對時使當今切事下款時弊上酌君恩臣之誓心為日必無下許行則進不許則退進退之分斷之不疑救時當先此陳啓况臣才本庸淺遭遇盛明天心向非不因人進擢居禁署訪以密謀恩獎太深謹請益至雖省行事無所愧心然上黷宸聽合當元責臣竊以察由賜安全壤壤之生得自茲日令越派輩授以台衡拔於萬死之中致在九霄之上將心撫已審分量恩陛下猶不以衆人之心待臣臣豈敢以

衆人之心事上皇天曰曰實鑒臣心得獻前言雖死
無恨無任感恩懇款之至

答宰相杜祐等賀德音表

朕以春候發生歲貢資始順陽和而布政賑貧之而
勸農載念罪人因除弊事隨其所利施以為恩富庶
之端實漸於此卿等義敦宗戚誠竭君親省茲賀陳
用增嘉歎

答京兆府二十四縣耆壽謝賑貸來表

朕勤求人隱慎卹農功念播殖之時必資首種慮懸
罄之日多見乏糧將使公私宜從歛散卿等名登庶
老業守先疇各勉農人以副朕意所謝知

答元義等請上尊號表

朕自君臨運逢休泰時豐歲稔禿醜殄夷此皆宗社
降靈忠賢宣力顧惟薄德敢受鴻名卿中發懇誠上
尊美號雖屬人望難負天功宜悉所懷勿固為請

答薛萃賀生擒李錡表

朕自嗣耿光每多惕厲念必先於除害志無忘於安
人李錡大負國恩自貽天罰師徒未動於疆場父子

俱肆於市朝信上天之禍淫與率土而同慶省視來表深鑒乃誠而賀知

答黃裳請上尊號表

朕以薄德嗣守丕圖不敢荒寧以弘理道幸屬歲時豐稔克寇息災風雨不愆禮園丘而報本雷霆未震釁太社而服刑斯皆十聖降靈幽贊寡昧百辟叶德馴致和平永惟弘名實懼虛美卿上稽祖訓下酌群情陳獻表章請加徽號衆于王公卿士降及耆文緇黃咸一乃心各三其請朕嘗以宰元化者曲成於物

法天道者從欲於人雖恤隱泣辜未臻三五之化而樂推欣戴難違億兆之心德非稱焉讓不獲已勉從所請深愧于懷

答李抃等謝許上尊號表

朕自臨萬邦僅經三載位雖托於人上化未洽於域中永念眇身敢當大號卿等義深宗室忠盡君親一其情誠三有陳獻逼以人望厭于天心遂抑所陳勉從其請固辭而事非獲已撫德而何以堪之再省謝章彌增惕厲

答馮伉請上尊號表

朕統承大寶時屬小康伐謀而吳蜀克清示信而華夷有截斯皆宗社垂祐天地降和非予冲人所能馴致卿上稽十聖之訓下酌萬人之心以為不讓強名未傷於體道屈已徇物何爽於至公遂抑素懷俯從衆望雖鴻名未稱無勞躋地之心而人欲不從即爽法天之德勉休勤請良用愧懷

表
答長安萬年兩縣百姓耆壽等謝許上尊號

朕每念雍熙慙未及於億兆永言徽號讓已至于再三而文武具寮緇黃庶老懇陳誠欵明引訓謨開予以天地無私之心起予以聖宗不易之訓以大道者無求於物物尊而不辭至公者非欲其名名立而不讓迫於同然之理不得已而許之卿等誠至感通義深欣戴再煩陳謝益用愧懷

答元素謝上表

卿用兼文武識合變通輟綱領於中朝授麾幢於外閭吏能足以惠物將略足以董戎人望所歸予心是

賴知卿已到本鎮當慰疲人深藉撫綏之方以安凋弊之俗日期報政歲望成功勉勤所圖用副朕意

荅韓臯請上尊號表

消沴致和幸遭昌運加名建號豈稱眇身而文武具寮黎獻庶老引古今之明訓陳億兆之懇誠謂德有所歸謳歌不可以苟讓謂功有所獻徽號不可以固辭遂抑中懷俯從衆望庶增脩乎茂實冀克副於鴻名卿發誠自中歸美于上勉依所請彌愧于心

荅馮伉謝許上尊號表

朕以眇身嗣于丕業心雖勞於惕勵化未及於雍熙永惟強名實懼虛美上自一二元老下及億兆黎人大洽詢謀明徵典訓增予以巍巍之號感予以顯顯之誠既通所懷俯從所請卿義深奉上志切戴君再省所陳彌增愧惕

荅百寮謝許追遊集宴表

在昔哲王居于人上推其憂樂與衆共之頃屬三亮荐興二載連獲凡百有位成一其心誠念嘉謀共致昭泰今四表無事三農有年思與羣情同其具慶是

宜削苛察之前弊煦寬裕之心思仁及下而啓迪歡
心澤先春而導迎和氣昨逢多故主憂且使臣勞今
致小康上安則宜下樂庶欲解人之愠粗申推已之
恩敢曰殊私煩於陳謝

荅李扞謝許遊宴表

朕自御萬方僅經三載運逢休泰俗漸和平當朝野
無虞之時見羣臣相遇之樂是故去滋彰之化弘優
賚之恩近自宗親下及士庶賜其宴衍許以優游蓋
以已之所安思與人之共樂雖夕惕而若厲每戒志
於無荒賜春遊以發生宜助時而有慶卿等榮崇宗
嗣恩重本支省所謝陳彌嘉誠懇

荅薛萃謝授浙東觀察使表

卿以踐吏途累聞能政及居藩鎮尤見忠勤訓導而
羣黎向方庶察而列郡承式實嘉乃績每簡予心宜
遷雄劇之藩以廣循良之化勉於為理副朕所懷所
謝知

荅朱仕明賀用尊號及恩赦表

朕以寡德嗣承睿圖俯從衆誠勉受鴻稱慶之大者

豈在予一人推而廣之宜及爾萬姓爰因受用之禮
遂施作解之恩俾與羣生同斯大慶卿盡忠訊旅推
誠戴君省所賀陳深見誠至

答盧虔謝賜男從史德政碑文并移貫屬京

兆表

卿男從史為國重臣自領大藩厥有成績公忠茂著
政理尤殊勒石所以表勲賜文所以褒德惟功是念
有善必旌是國舊章非予私渥昨又請移鄉貫願隸
京邑家聲益振巨節逾彰雖清望標門崇冠山東之
族而丹心戀闕取為關外之人載省懇誠彌深嘉歎
所謝知

答杜佑謝男師損除工部郎中表

卿道贊謨猷功成輔弼師損克承訓義雅有令名豈
惟賞延兼以能選班行以次頗積功勤即署稍遷未
為渥澤省茲章奏深見懇誠所謝知

答王錡陳讓淮南節度使表

卿自領大藩累彰殊効惠安百姓表正一方雖戀闕
誠深然殿邦寄切既執圭而肆覲宜返旆而勞旋况

淮海要衝旌旄重任永言共理已有成功方注意於撫綏何瀝誠而陳讓

答韓弘同平

致理之道審官為先相之任所冀外為藩翰肅清之威內贊謨猷宣股肱之力僉諧允屬衆望攸歸方注意於安危何執謙而陳讓所進官誥今却賜卿無或再辭即斷來表

答韓弘再讓平章事表

將相兼委實難其人非其德不可謬承當其才不在懇讓朕非虛授卿勿固辭宜斷來章即奉成命已具前詔當體朕懷

答杜蕪謝上河南少尹知府事表

三川封畿實重其任貳職綱紀亦難其人卿素懷器能累著聲績亞理以明慎選專領以展長才知已下車當趣綏撫佇聞報政用副憂勤所謝知

答王錡賀賑恤江淮德音表

水旱流行江淮艱食朕明申詔親遣使臣蠲其逋租賑以公廩爰興利物之利用表憂人之憂庶俾疲氓

均霑惠澤卿克勤乃職共理為心省茲賀陳深見誠意

荅宰相社佑等賀德音表

古先聖王託于人上與百姓同其欲與天下共其憂惟推是心可底于道朕臨御萬國逮茲五年惕厲之懷雖勤於夙夜愆伏之候猶害於歲時思革弊以救災在濟人而抑己是欲歛刑緩死已責郵貧罷鄰國之貢珍省宮廐之煩費急春令而布仁行惠先南風而解愠阜財庶憑歡心以召和氣卿等或匪躬獻替或悉力弼諧啓沃之間已申霖雨之望燮理之妙重見陰陽之和各宜勉之以輔予理所賀知

荅宗正卿李詞等賀德音表

朕統承鴻緒子育蒼生累歲有秋今春不雨在陰陽之數雖有盈虛為父子之心敢忘惻隱俾除人青以盪歲災卿等任重宗卿恩編屬籍省茲陳賀匪見忠誠

荅將軍方元蕩等賀德音表

朕以時陽舛候春澤愆期思備旱之方無如砥省務

動天之德莫若精誠是以脩己恤人去煩節用異荅
天戒以致時和卿志竭邦家職脩軍衛省茲章表深
用嘉之所賀知

荅杜兼謝河南尹表

卿文通吏道學達政源凡歷官常輒聞績効觀能以
授俾亞理於三川見可而遷宜專臨其一府盡委封
畿之政仍兼漕運之權歲時之間佇有勤効勉恭爾
職重副予懷所謝知

荅段佑等賀用皇太子禮畢表

朕成膺統序恭守典常爰推至公乃命長子使主國
器用貞邦家用畢禮成良增威慶卿等各司軍府同
奉表章備見忠誠益深嘉歎所賀知

荅李詞賀處分王士則等德音表

朕臨馭天下以懲勸為先有惡必誅有功必念顧承
宗之罪誠合討除思武俊之勲宜令嗣襲况墳墓禁
其剪伐將校許以歸降庶明用師蓋非獲已卿等誠
奉本支省茲賀章備見忠藎

批宰相賀赦王承宗表

先臣武俊功不可忘後嗣承宗過而能改朕所以捨其罪悔議以勲親垂宥過之恩尚且及爾十代引泣辜之責誠合在予一人與其黷武而取威不若匿瑕而務德卿等重居台輔密贊謀猷發於衷誠有此稱賀省閱章奏嘉歎久之

荅王承宗謝洗雪及復官爵表

帝者之道蕩然無私唯推赤心以牧黔首故一夫不獲若納之於隍一物歸誠則容之如地况卿家聯懿戚寵自先朝祖立茂功賞延後嗣因人誑誤不染疵

瑕滌以恩波煦之寵澤撫舊封而察燕六郡進新律而統制三軍蕩穢加恩何以過此及覩來表乃見深誠言必由衷事皆知感承家嚴慶誓繼力於前脩補過酌恩頤指期於後効永言爾志甚叶朕懷勉思始終用副眷矚所謝知

荅高郢請致仕第二表

卿有忠貞之節立於險中有清重之名鎮于朝右而能始終有道進退有常援禮引年遺榮致政人鮮知止卿獨能行不唯振起古風亦足激揚時俗於卿則

確然難奪在朕則情豈易忘誠鑒乃懷未允來表

答裴均讓中書侍郎平章事表

卿自登台輔每竭忠貞一身兼彝百度惟序致君盡力以積股肱之勤憂國勞心微生媵理之疾暫從休告遂獻表章所陳雖是卿心所請殊非朕意宜加調攝速就平和以副虛懷無為固讓

答劉總謝檢校工部尚書范陽節度使表

卿幼承義訓長有令聞能遵忠孝之風不墜弓裘之業朕所以命加異等寵冠常倫特授雙旌超登八座

豈惟延賞亦在任能將懋前脩勉申後効載省章疏深鑒誠懷所謝知

答任迪簡讓易定節度使表

卿脩文立身經武致用每誓心於忠勇常濟事以智謀自副戎車已屬時望及分旌鉞果愜軍情况武義之師輸忠伏順所期慰撫以就輯寧何至搗謙有茲陳讓所進官誥今卻賜卿宜體朕懷即斷來表

答裴均讓宰相第三表

卿疾病已來表疏相繼雖辭乞之誠頗切而注望之

意方深所以來章以而未報然念卿勤懇之請至于再三若心不甚安即疾難速愈是用輟樞劇之務加崇重之官稍遂優閑佇期痊復勉從爾志深抑予懷

荅裴垵謝銀青光祿大夫兵部尚書表

卿自居鈞軸日獻謀猷戴君常竭其股肱憂國每形於顏色及嬰疾病益不遑安未踰四旬已至三讓撫謙秉易退之道堅懇陳難奪之詞遂抑朕心俯從卿請而七命印綬五兵尚書官秩甚崇事務稍簡就以優養異乎平康載省表章深見誠意

荅文武百寮嚴綬等賀御製新譯大乘本生心地觀經序表

朕勤求道本廣挹教源以貞如不二之宗助清淨得一之化况斯經典時為大乘名理精微翻譯成就雖契心則離於文字而得意亦假於筌蹄庶使發揮因為述序卿等精通外學懇竭忠誠引經贊揚奉表稱賀再三省鑒嘉歎以之

荅李遜等謝恩令附入屬籍表

卿先父頃逢多難嘗立大功每想忠勞豈忘存歿念

先臣之績雖書名於太常推同姓之恩更附籍於宗
正俾增榮於一族兼延寵於九泉卿等或詩禮承家
或弓裘奉業咸鍾新命慶屬本支深嘉誠懇所謝知
荅元應授岳鄂觀察使謝上表

夏口重鎮屬在時賢非明肅不能理其軍非簡靜不
能阜其俗以卿有仁厚之質審直之風累踐班行宿
著名節遂輟中憲往臨外藩知己下車深慰人望佇
茲報政用副朕懷所謝知

荅李鄴授淮南節度使謝上表

卿抱兼人之才兼狗公之節每登要職悉著能名若
刃發硎投而不滯如玉在佩動必有聲朕以卑淮而
南人物繁會非庶明何以貞師察俗非簡惠何以通
商綏農前勞既彰後効何遠載省來表知己下車勉
副虛懷佇觀新政所謝知

批李夷簡賀御撰君臣事蹟屏風表

朕思求理化新閱典墳至於去邪納諫之規勤政慎
兵之誠取之而作鑒書以為屏與其散在圖書心存
而景慕不若列之繪素目觀而躬行庶將為後事之

師不獨觀古人之象卿詞彰恭順義見忠規省覽再
三深叶朕意所賀知

批百寮嚴綬等賀御撰屏風表

朕烈祖太宗以古為鏡用輔明聖實臻理平垂作孫
謀每懼乎失墜取為殷鑒遂飭乎丹青至若明君直
臣前言往事森然在目如見其人論列是非既庶幾
為座前之誠發揮獻納亦足以開臣下之心况卿等
職在儀刑政當補察各勤所任共副茲懷所賀知
白樂天文集卷之十